

III.

Za realizaciju ovog rješenja zadužuju se Ministarstvo finansija, Ministarstvo obrazovanja i nauke i JU OŠ „Ivan Goran Kovačić“ Gradačac.

IV.

Ovo rješenje stupa na snagu danom donošenja, a objavit će se u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
MINISTARSTVO FINANSIJA

MINISTAR

Suad Mustajbašić, dipl.ecc., v.r.

Broj: 07/1-11-24041/25
Tuzla, 21.08.2025. godine

MINISTARSTVO OBRAZOVANJA I NAUKE TUZLANSKOG KANTONA

744

Na osnovu člana 23a. stavovi (1) i (2) Zakona o osnovnom odgoju i obrazovanju – prečišćeni tekst („Službene novine Tuzlanskog kantona“, br. 10/20, 8/21, 11/21, 22/21, 5/22, 6/22 – presuda US FBiH, 10/22, 11/22, 9/23 – presuda US FBiH, 12/23 i 5/25) i člana 35a. stavovi (1) i (2) Zakona o srednjem obrazovanju i odgoju – prečišćeni tekst („Službene novine Tuzlanskog kantona“, br. 10/20, 11/20, 8/21, 11/21, 22/21, 5/22, 6/22 – presuda US FBiH, 10/22, 11/22, 9/23, 12/23 i 5/25), ministar obrazovanja i nauke donosi

PRAVILNIK

o obaveznom isticanju simbola i intoniranju himne Bosne i Hercegovine u osnovnim i srednjim školama na području Tuzlanskog kantona, te odabiru i intoniranju svečane pjesme u osnovnim i srednjim školama čiji je osnivač Skupština Tuzlanskog kantona

Član 1.

(Predmet Pravilnika)

Ovim pravilnikom propisuje se način isticanja simbola i intoniranja himne Bosne i Hercegovine u školama na području Tuzlanskog kantona (u daljnjem tekstu: Kanton), te odabir i intoniranje svečane pjesme u osnovnim i srednjim školama čiji je osnivač Kanton.

Član 2.

(Isticanje zastave Bosne i Hercegovine i zastava strane države)

(1) Osnovna i srednja škola (u daljnjem tekstu: škola) na području Kantona je obavezna istaknuti zastavu Bosne i Hercegovine na ulazu u školsku zgradu i prostorijama predviđenim za protokolarne aktivnosti, te pri organizovanju školskih priredbi i svečanosti.

(2) Nije dozvoljeno isticanje oštećene, neuredne ili izbljedjele zastave Bosne i Hercegovine.

(3) Škola, čiji je osnivač Skupština Kantona, može uz zastavu Bosne i Hercegovine u prostorijama predviđenim za protokolarne aktivnosti, organizovanju školskih priredbi i svečanosti istaknuti zastavu Kantona i zastavu škole, s tim da se zastava Bosne i Hercegovine isticu u sredini ako su istaknute tri zastave, odnosno sprijeda gledano s lijeve strane kada je zastava Bosne i Hercegovine pored druge zastave.

(4) Škola čiji je osnivač drugo pravno i fizičko lice na ulazu u školsku zgradu i u prostorijama predviđenim za protokolarne aktivnosti, te pri organizovanju školskih priredbi i svečanosti, može uz zastavu Bosne i Hercegovine istaknuti zastavu osnivača, države osnivača i/ili zastavu škole, s tim da se zastava Bosne i Hercegovine isticu u sredini ako su istaknute tri zastave, odnosno sprijeda gledano s lijeve strane kada je zastava Bosne i Hercegovine pored druge zastave.

(5) Ukoliko tokom protokolarnih aktivnosti, školskih priredbi i svečanosti učestvuju strani državljani, može se istaknuti zastava strane države, s tim da se zastava Bosne i Hercegovine isticu sprijeda gledano sa lijeve strane u odnosu na zastavu strane države.

(6) Kada institucije Bosne i Hercegovine, institucije Federacije Bosne i Hercegovine, Tuzlanskog kantona ili lokalne zajednice proglašaju „Dan žalosti“, zastava Bosne i Hercegovine i druga obilježja iz stavova (3) i (4) ovog člana, se isticu na pola koplja, odnosno jarbola.

Član 3.

(Isticanje grba Bosne i Hercegovine i drugih simbola)

(1) Škola je obavezna istaknuti grb Bosne i Hercegovine na počasno mjesto u svakoj učionici i kabinetu u kojima se realizuje nastava, školskoj biblioteci, osim u specijalizovanim kabinetima, radionicama za praktičnu nastavu i fiskulturnoj sali.

(2) Grb Bosne i Hercegovine se ne može upotrebljavati ukoliko je oštećen ili je svojim izgledom nepodoban za upotrebu. Takav grb se povlači iz upotrebe i zamjenjuje novim.

(3) Veličina grba Bosne i Hercegovine prilikom isticanja treba biti proporcionalna veličini prostora i vidno istaknuta, tako da se poštuju estetski standardi i dostojanstvo državnog simbola.

(4) Isticanje grbova i drugih simbola stranih država u školskim prostorijama nije dozvoljeno, izuzev onih koji služe za realizaciju nastavnog plana i programa i provođenje školskih aktivnosti i manifestacija.

(5) Ukoliko su istaknuti grbovi i drugi simboli stranih država tokom provođenja školskih aktivnosti i manifestacija, oni se moraju ukloniti neposredno po završetku tih aktivnosti.

(6) U prostorijama škole nije dozvoljeno isticanje simbola, uključujući fotografije ili objekte koji se odnose na političke stranke, pokrete i lidere, odnosno simboli, fotografije ili objekte koji se odnose na osobe ili događaje koji su presudama domaćih ili međunarodnih sudova dovedeni u vezu sa ratnim zločincima, izuzev onih koji služe za realizaciju nastavnog plana i programa.

(7) Ukoliko su u svrhu realizacije nastavnog plana i programa korišteni simboli, fotografije ili objekti iz stava (6) ovog člana, oni moraju biti uklonjeni neposredno po okončanju realizacije sadržaja iz nastavnog plana i programa.

(8) U prostorijama škole se može isticati grb i drugi simboli Kantona, lokalne zajednice, osnivača ili škole u skladu sa zakonom i drugim važećim propisima.

Član 4.

(Intoniranje Državne himne Bosne i Hercegovine i svečane pjesme)

(1) Državna himna Bosne i Hercegovine intonira se u školi na početku školske godine, na početku drugog polugodišta, prije početka prvog nastavnog sata u prvoj, odnosno prvoj i drugoj smjeni, na početku svih svečanih priredbi u školi, manifestacija i takmičenja.

(2) Nakon intoniranja Državne himne Bosne i Hercegovine, u školama čiji je osnivač Kanton, intonirat će se svečana pjesma.

(3) Odluku o odabiru svečane pjesme iz stava (2) ovog člana donosi Ministarstvo obrazovanja i nauke Tuzlanskog kantona (u daljnjem tekstu: Ministarstvo), nakon provedene

javne konkursne procedure, u skladu sa ovim pravilnikom.

(4) Svečana pjesma iz stava (2) ovog člana intonira se pri obilježavanju svečanih priredbi u školi, manifestacija i takmičenja.

(5) Intoniranje himne druge države nije dopušteno, izuzev na takmičenjima međunarodnog karaktera u čast prvoplasiranog takmičara.

Član 5.

(Odabir svečane pjesme)

(1) Javni konkurs (u daljnjem tekstu: konkurs) za odabir svečane pjesme koja se intonira u osnovnim i srednjim školama čiji je osnivač Kanton raspisuje Ministarstvo na zvaničnoj internet stranici Ministarstva i traje 30 dana, u skladu sa odlukom o raspisivanju konkursa koju donosi ministar obrazovanja i nauke Tuzlanskog kantona (u daljnjem tekstu: ministar).

(2) Konkurs za odabir svečane pjesme sadrži:

- a) uslove i kriterije za odabir svečane pjesme,
- b) popis dokumentacije koja se dostavlja,
- c) način i rok podnošenja prijave.

Član 6.

(Pravo na učešće na konkursu za odabir svečane pjesme)

Pravo učešća za odabir svečane pjesme imaju fizička lica s prebivalištem u Bosni i Hercegovini u svojstvu autora ili koautora.

Član 7.

(Uslovi i kriteriji za odabir svečane pjesme)

(1) Kompozicija svečane pjesme mora ispunjavati sljedeće uslove:

- a) trajati od 60 do 120 sekundi,
- b) biti napisana na bosanskom, hrvatskom ili srpskom jeziku,
- c) biti originalna i prethodno neobjavljena.

(2) Kompozicija svečane pjesme mora ispunjavati sljedeće kriterije:

- a) razvijati svijest o pripadnosti državi Bosni i Hercegovini,
- b) njegovati odgojno-obrazovne vrijednosti,
- c) odražavati geografski, historijski i kulturni identitet Bosne i Hercegovine,
- d) biti pogodna za izvođenje hora i imati izraženu muzičku dinamiku u skladu sa karakterom svečane pjesme.

(3) Odlukom iz člana 5. stav (1) ovog pravilnika mogu se utvrditi i drugi, dodatni, kriteriji za odabir svečane pjesme.

Član 8.

(Način podnošenje prijave)

(1) Prijava na konkurs za odabir svečane pjesme podnosi se na obrascu čiji sadržaj se utvrđuje odlukom iz člana 5. stav (1) ovog pravilnika.

(2) Prijava se podnosi pod šifrom i obavezno sadrži:

- a) tekst pjesme (u word ili pdf formatu),
- b) notni zapis (u pdf formatu),
- c) audio snimak (u mp3 formatu),
- d) izjavu o originalnosti i prenosu prava,
- e) biografiju autora/koautora,
- f) zasebnu kovertu sa ličnim podacima označenim istom šifrom.

(3) Šifru iz stava (2) ovog člana bira autor/koautori.

Član 9.

(Stručna komisija za odabir svečane pjesme)

(1) Ministar rješenjem imenuje stručnu komisiju za odabir svečane pjesme, u skladu sa ovim pravilnikom.

(2) Stručnu komisiju za odabir svečane pjesme čine:

a) predstavnik Ministarstva koji je ujedno i predsjednik komisije

b) nastavnik muzičke kulture iz osnovne ili srednje škole,

c) dva stručnjaka iz oblasti muzike,

d) pedagog škole.

(3) Ukoliko se utvrdi da je predsjednik ili član/ovi stručne komisije u krvnom ili tazbinskom srodstvu prve linije sa autorom ili bilo kojim koautorom koji se prijavljuju na raspisani konkurs, njegovo bodovanje će se izuzeti iz konkursne procedure za sve pristigle prijave.

Član 10.

(Postupak odlučivanja o odabiru svečane pjesme)

(1) Ministar rješenjem imenuje komisiju za ocjenu ispunjenosti uslova za odabir svečane pjesme, koja se sastoji od tri člana.

(2) Komisija iz stava (1) ovog člana dostavlja stručnoj komisiji iz člana 9. stav (1) ovog pravilnika liste kompozicija za uži odabir, na osnovu ispunjavanja uslova iz člana 7. stav (1) ovog pravilnika, označavajući ih odabranim šiframa.

(3) Stručna komisija za odabir svečane pjesme ocjenjuje kompozicije u sljedećim fazama, i to:

a) faza bodovanja kompozicija,

b) faza sačinjavanja zbirne liste.

(4) Bodovanje kompozicija koje uđu u uži odabir vrši se na osnovu kriterija iz člana 7. stav (2) i stav (3) ovog pravilnika ocjenama od 1 do 10 za svaki pojedini kriterij.

(5) Nakon bodovanja iz stava (3) ovog člana, stručna komisija sačinjava zbirnu listu i dostavlja Ministarstvu prijedlog za odabir svečane pjesme.

(6) U slučaju jednakog broja bodova na zbirnoj listi, prijedlog za odabir svečane pjesme se utvrđuje većinom glasova od ukupnog broja članova stručne komisije.

(7) Stručna komisija ima pravo na naknadu čija visina će se, u skladu sa propisima Kantona, utvrditi rješenjem iz člana 9. stav (1) ovog pravilnika.

Član 11.

(Odluka o odabiru svečane pjesme i autorska prava)

(1) Na prijedlog stručne komisije, Ministarstvo donosi odluku o odabiru svečane pjesme.

(2) Odlukom o odabiru svečane pjesme, autor odnosno koautori sva imovinska autorska prava prenosi/e na Ministarstvo, što će se bliže urediti ugovorom.

(3) Ministarstvo i škole, čiji je osnivač Skupština Kantona, imaju pravo korištenja svečane pjesme bez obaveze pribavljanja bilo kakve daljnje saglasnosti.

Član 12.

(Naknada)

Autoru, odnosno koautorima izabrane kompozicije pripada novčana naknada, čija visina se utvrđuje odlukom iz člana 9. stav (1) ovog pravilnika i objavljuje u tekstu konkursa.

Član 13.

(Stupanje na snagu)

Ovaj pravilnik stupa na snagu narednog dana od dana objavljivanja u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo obrazovanja i nauke

MINISTAR

Dr. sc. Ahmed Omerović, v.r.

Broj: 10/1-02-016782-1/25
Tuzla, 04.08.2025. godine

